

PENGLAM CHRISTIAN!

Penglam tangthu i theikhin hi. Azi in, alo kuanding ciangin apapi ahi Penglam kiangah, "Nau na en in," ci-in vaikhak hi. Penglam zong thumang mahmah in, na en ning ci dep in, kam ciam pia hi. Sunkim pawlciang in, ata neih pen inn kongkhak lamah hong tawtawntawn in, Penglam in atutna pan en hithiat hi. Ata hongpai hongpai in, inn kong pan in, inn nuai ah hongkia takpi hiau hi. Peng Lam in, atutna panin hoihpha takin en hithiat hi. Ni hongtum pianpian in vaiciah hun ta ahiah manin, azi neih zong lopan in, innlam manawh in hong ciah ta hi. Ka Pasal in kata neih hoihtakin ana en tammaw ci kawm kawm in, hong nawhpai mahmah hi.

Inn hongtun ciangin, naunawi pia nuam ahiah manin, ata azon leh hongmu loin, apasal hong dong hi. "I nau e" acih leh Penglam in, "Inn nuai ah kia," cihsan hiatvial hi. Azi zong pataulua ahiah manin, ata ava delh leh nasikhin mawk hi. Khasia lua mahmah ahiah manin, apasal kiangah, "Nau na en in kongcih, i nau si ta hilo maw" ci-in kapkawm in hongtaai hi. Tua leh Penglam zong nahai samlo in, hong dawngkik pah lian a, "Nau na en in nongcih, ka en mah ve leh. Apai zong mu ing. Akiat zong mu ing. Asih laitakzong mu ing. Katutnapan hoih takmah a ka et hi," ci-in, hongdawngkik hi. Tuapan kipan Penglam nau et ci-in, paunak in kizanghi. Singlamteh tungah Topa Jesu in anu pen ei leitung mite hongpia in, "Na Nu na en in" (Jn 19:26-27) ci-in, hoihpha tak in hong vaikhak hi. Tu hun Christian te nuntakzia i etkik ciang in, Penglam nau-et bangin Jesu Nu Maria a en kitam mahmah hi. Jesu Topa ii anu, Maria in, "Akhang akhangin kei thupha ngahnu hong ciding hi," (Lk 1:48) ci hi. Tu hun ciangin, Maria pen Nu banga ngaihsut ding sangin, thupha ngahnu nangawn acinuamlo Christian kitam mahmah hi. Topa' kammal pen Penglam zithuman a, amang Christian kitam hi. Tua ahiah manin, tuabang Christian te pen Penglam christian cileng kituak mahmah khading hi.